

**Siunnersuut uunga:****Utoqqarnut tapersersuinissaq pillugu Inatsisartut inatsisaat****Kapitali 1***Atuuffissaa tapersersorneqarnissamullu pisinnaatitaaneq**Atuuffia*

**§ 1.** Inatsisartut inatsisaat manna utoqqarnut Kalaallit Nunaanni najugaqartunut atuuppoq.  
*Imm. 2.* Oqaaseq ”utoqqaq”, Inatsisartut inatsisaanni matumani ima paasineqassaaq, utoqqalinersiaqarneq pillugu Inatsisartut inatsisaanni § 1 naapertorlugu, inuit utoqqalinersiaqalernissamut ukioqalertut, aamma utoqqalinersiaqarneq pillugu Inatsisartut inatsisaat malillugu utoqqalinersiaqartut, imaluunniit utoqqalinersiaqarneq pillugu Inatsisartut inatsisaanni §§ 2-4 malillugit tamatuminnga piumasaaqatinik naammassinnittut.

*Tapersersorneqarnissamut pisinnaatitaaneq*

**§ 2.** Utoqqaq tapersersorneqarnissamut pisinnaatitaavoq, § 7 malillugu pisariaqartitsinermik naliliinerup takutippagu, kommunimit tapersersorneqarnissamik pisariaqartitsisoq.

*Imm 2.* Tapersersorneqarneq ataqatigiissaagaasumik tamanullu isiginnittumik aamma utoqqarnut ataasiakkaanut pitsaernerpaaq aallaavigalugu ingerlanneqassaaq.

*Imm. 3.* Pissutsini utoqqarmut tunngassutilinni tamani utoqqaap nammineq isumai sapinngisamik aallaavigineqassapput utoqqaap timikkut tarnikkullu piginnaasaqarnera pissusissamisoortumik eqqarsaatigalugu.

*Imm. 4.* Utoqqaq nammineq angerlarsimaffimmini najugaqaannarnissamut, pineqartup taamatut kissaateqarluni oqaatigippagu, pisinnaatitaavoq. Piumasaaqataavoq, nammineq angerlarsimaffimmi najugaqaannarnermi, inuup nammineq allaluunniit atugarissaarnerat ulorianartorsiortinneqassanngitsoq imaluunniit ulorianartorsiortnermut aarlerinartorsiortinneqassanngitsoq.

*Inatsisit allat malillugit tapersersorneqarnissamut tunngasut*

**§ 3.** Utoqqaat, inatsisit allat malillugit tapersersorneqareertut, inatsisit allat malillugit tapersersuutigittinneqariinngitsunik, Inatsisartut inatsisaat manna malillugu tapersersorneqarnissamik pisariaqartitsinerannik, § 7 malillugu pisariaqartitsinermut naliliineq ersersitsippat, Inatsisartut inatsisaat manna malillugu tapersersorneqarsinnaatitaapput.

**Kapitali 2***Aalajangiisinnaaneq akisussaaffillu*

§ 4. Inatsisartut inatsisaat manna malillugu utoqqaap pisariaqartumik tapersorsorneqarnissaa, aamma utoqqarnut tapersorsorneqarnissamut periarfissanik pisariaqartunik peqarnissaa kommunalbestyrelsip isumagissavaa.

*Imm. 2.* Inatsit manna malillugu utoqqaat ikiorneqarnissamut tapersorsorneqarnissamullu pisariaqartitaat naammassineqarnissaata sapinngisamik qulakkeerneqarnissaanut kommunalbestyrelsi ujartuinissamut akisussaaffeqarpoq.

*Imm. 3.* Kommunalbestyrelsip utoqqaat pitsaaliuinermik iliuuseqarfiginissaannut, tapersorsorneqarnissaannut atortorissaarutinillu sapinngisamik neqeroorfigissavai.

*Imm. 4.* Kommunalbestyrelsi pisuni immikkut ittuni, neqeroorutit taamaattut pitsaanerpaamik utoqqaap pisariaqartitaanik naammassinnissinnaasutut nalilerneqarpata, kommuninit allanit pilersinneqartunik ingerlanneqartunillu, tapersorsuinissamut periarfissanik atuinikkut, imm. 1 malillugu pilersuisussaataitaanerminik naammassinnissinnaavoq.

### Kapitali 3

#### *Suliassat suliarineqartarnerannik malittarisassat*

##### *Piffissaliussat*

§ 5. Inatsisartut inatsisaat manna malillugu tapersorsorneqarnissaq pisariaqartinneqarnersoq pisinnaatitaaffigineqarnersorlu paasineqarnissaa siunertaralugu, taamaattoqarpallu suut tapersiissutaassanersut pillugit saaffiginnissutit sapinngisamik piaarnerpaamik kommunalbestyrelsip suliarissavai.

*Imm. 2.* Inatsisartut inatsisaat manna malillugu, tapersorsorneqarnissamik qinnuteqaatip imaluunniit saaffiginnissutit tiguneqarneraniit aalajangiinissat tungaanut, piffissaq qanoq sivisutigissanersoq pillugu kommunalbestyrelsi suliassat suliarineqartarnerannut piffissaliussanik aalajangersaassaaq.

*Imm. 3.* Imm. 2 naapertorlugu suliami tigussaasumi piffissaliussaq eqquutitinneqarsinnaanngippat, piffissaliussaq qaangiutsinnagu aalajangiineq qaqugu naatsorsuutigineqassanersoq, kiisalu piffissaliussap sooq eqquutitinneqarsinnaannginnera pillugit allaganngorlugu utoqqaq nalunaarfigineqassaaq.

##### *Oqaloqatigiinneq*

§ 6. Kommunalbestyrelsi, imm. 2-mi taaneqartunik pisoqarpat minillugit, utoqqarmik minnerpaamik ataasiarluni oqaloqateqassaaq, makkua pillugit aalajangiinissaq sioqqullugu:

- 1) § 11 malillugu tapersorsuineq imaluunniit najugaqarnissamik neqerooruteqarneq.
- 2) § 14 malillugu tapersorsuinerup allanngortinneqarnera imaluunniit unitsinneqarnera.
- 3) § 15 malillugu najugaqarfissamut neqeroorummut allamut nuunnissaq pillugu neqerooruteqarneq.

*Imm. 2.* Inuup piginnaasaqarnera eqqarsaatigalugu oqaloqatigiinnissap ingerlanneqarnissaa aalajangiisumik naleqqutinngippat, imm. 1 malillugu oqaloqatigiinneq ingerlanneqassanngitsoq kommunalbestyrelsip aalajangersinnaavaa. Oqaloqatigiinneq

ingerlanneqarsinnaangippat, aalajangiinissatut pilersaarutigineqartoq pillugu utoqqaap isumaa allatut pissarsiariniarneqassaaq. Utoqqarmik oqaloqatigiinneq ingerlanneqangippat, § 8 malillugu tapersorneqarnissamut pilersaarutaanut tamanna tunngavilersorlugu allanneqassaaq.

*Pisariaqartitsinermik naliliineq*

§ 7. Utoqqaq kapitali 7-imi aalajangersakkat malillugit najugaqarnissamik neqeroorummi najugaqassasoq imaluunniit kapitali 5-imi aalajangersakkat malillugit tapersorneqarnissamik pisariaqartitsisoq ilimagineqassappat, utoqqarmut pissutsit pillugit pisariaqartitsinermik naliliinermik kommunalbestyrelsi suliaqartariaqarpoq. Taamaattoq pisariaqartitsinermik naliliinissaq pisariaqanngitsoq ersarippat, naliliineq ingerlanneqassanngilaq.

*Imm. 2.* Kapitali 8 malillugu nalunaarutiginnittoqartillugu, kommunalbestyrelsi pisariaqartitsinermik naliliinermik suliaqarnissamut pisussaaffeqarpoq, pisariaqanngitsoq ersarissuutillugu.

*Imm. 3.* Utoqqaap iliuseqarneratigut imaluunniit kissaateqarneratigut kommunalbestyrelsi pisariaqartitsinermik naliliinermik suliaqarnissamut pisussaaffeqarpoq.

*Imm. 4.* Pisariaqartitsinermik naliliineq sapinngisamik utoqqaq suleqatigalugu ingerlanneqassaaq, pineqartullu nammineq isumai pisariaqartitsinermillu oqaaseqarnera tunngavigineqassallutik.

*Imm. 5.* Pisariaqartitsinermik naliliineq pissutsinik pisinnaatinneqarpat, sapinngisamik qajassuartumik ingerlanneqassaaq, aamma siunertaasumi allassimasumit annertunerusinnaanani.

*Imm. 6.* Pisariaqartitsinermik naliliinermi kommunalbestyrelsip pissutsit attuumassuteqartut tamaasa pillugit naliliissaaq. Tassunga ilanngullugit makkua isummerfigineqassapput:

- 1) Imminut isumassorneq.
- 2) Pissusilersorneq atugarissaarnerlu.
- 3) Ilaqutariinnermi pissutsit.
- 4) Inooqatigiinnermi pissutsit inooqatigiinnermilu inooqataaneq.
- 5) Peqqissutsimut pissutsit.
- 6) Inuiaqatigiinni peqataaneq.
- 7) Utoqqaq timikkut, tarnikkut, silassorissutsikkut imaluunniit malugisaqarsinnaassutsikkut piginnaanikillinersoq, aamma inuit innarluutillit tapersorneqarnissaat pillugu Inatsisartut inatsisaat malillugu tapersorneqarnissaa attuumassuteqarnersoq.
- 8) Inatsisartut inatsisaat manna imaluunniit inatsisit allat malillugit tapersorneqarneq inummumut ikiorsiissutigineqareersoq.

*Imm. 7.* Imm. 6, nr. 5 malillugu peqqissutsimut pissutsinik naliliinermut atatillugu Kalaallit Nunaanni Peqqinnissaqarfimmiit peqqinnissaq pillugu naliliinermik kommunalbestyrelsi pissarsiniarsinnaavoq.

*Imm. 8.* § 8 naapertorlugu pisariaqartitsinermik naliliineq tapersorneqarnissamik pilersaarummik tunngavilersukkamik allaganngorlugu inerneqassaaq.

*Imm. 9.* Pisariaqartitsinermik naliliineq pillugu malittarisassanik erseqqinnerusunik Naalakkersuisut aalajangersaasinnaapput, tassunga ilanngullugit pisariaqartitsinermik naliliinerup ingerlanneqarnissaa, ilusissaa imassaalu kiisalu pisariaqartitsinermik naliliinerup ingerlanneqarnissaanut naammassineqarnissaanullu piffissamut tunngatillugu piumasaqaatit.

*Tapersorneqarnissamik pilersaarut*

**§ 8.** Utoqqarnut tapersorneqarnissamik pilersaarutininik allaganngorlugit kommunalbestyrelsit suliaqassapput ima pisoqartillugu:

- 1) § 7 naapertorlugu pisariaqartitsinermik naliliinermut atatillugu pitsaaliuinermik imaluunniit tapersorsuinermik suliniuteqarnissamut pisariaqartitsinermik takussutissaqartillugu.
- 2) Kapitali 7 malillugu utoqqaat najugaqarfianni, utoqqaat najugaqatigiiffianni imaluunniit utoqqaat angerlarsimaffianni najugaqarnissamik imaluunniit kapitali 5 malillugu tapersorneqarnissamik aallartitsinissaq pillugit aalajangiinissaq sioqqullugu.
- 3) Kapitali 5 naapertorlugu tapersorneqarnissamik allanngiineq pillugu aalajangiineq sioqqullugu.

*Imm. 2.* Tapersorneqarnissamik pilersaarut inummut tunngasuussaaq aamma siunertamut allassimaneranit annertunerusinnaanani.

**§ 9.** Tapersorneqarnissamik pilersaarut tulliini taaneqartunik allaatiginninnermik imaqassaaq:

- 1) Tapersorneqarnissamut siunertaq anguniagarlu.
- 2) Anguniakkap angunissaanut tapersorneqarneq sorleq pisariaqartinneqarnersoq.
- 3) Piffissamik killiliussa, qaqugu tapersorsuisoqassanersoq, aamma qaqugu anguniagaq anguneqassanersoq.
- 4) Pissutsit immikkut ittut allat, tapersorneqarnissamik naliliinermut piviusunngortitsinermullu pingaaruteqarsinnaasut, soorlu ilaquttat attaveqarfiillu, najugaqarneq, inuttut ikiorteqarneq, katsorsartinneq imaluunniit atortorissaarutit.

*Imm. 2.* Tapersorneqarnissamik pilersaarut sapinngisamik utoqqaq oqaloqatigalugu suliarineqassaaq.

*Imm. 3.* Kapitali 7 naapertorlugu utoqqaat najugaqatigiiffianni imaluunniit utoqqaat angerlarsimaffianni najugaqartoqartillugu, tapersorneqarnissamik pilersaarutip imarisaata ilai attuumassuteqartut utoqqaat najugaqatigiiffiannut imaluunniit utoqqaat angerlarsimaffiannut tunniunneqarnissaat kommunalbestyrelsip isumagissavaa.

*Imm. 4.* Tapersorneqarnissamik pilersaarut utoqqarmut tunniunneqassaaq, aamma tunniussinermut atatillugu imarisaa pillugu kommunalbestyrelsip ilisimatitsissutigissavaa.

*Imm. 5.* Tapersorneqarnissamik pilersaarutip ilusaa imarisaalu kiisalu tapersorneqarnissamik pilersaarutip ingerlanneqarnissaanut naammassineqarnissaanullu piffissamut tunngatillugu piumasaqaatit pillugit malittarisassanik erseqqinnerusunik Naalakkersuisut aalajangersaassapput.

*Suliani tigussaasuni paasissutissanik paarlaasseqatigiinneq*

**§ 10.** Najugaqarfissamik neqeroorut, kommunalbestyrelsi aamma peqqinnissaqarfik suliat tigussaasut pillugit suleqatigiinnermut ilaatillugu inummut paasissutissanik tunngasunik, tassunga ilanngullugit paasissutissat inummut tunngasut mianernartut, paasissutissat suliap suliarineqarneranut pingaaruteqarpata, ingerlatitseqqissinnaapput. Utoqqaq suliami pineqartoq taamaallaat akuersiteqqaarlugu paasissutissanik pissarsisinnaasoqarlunilu ingerlatitseqqiisoqarsinnaavoq, taamaattoq takuuk. imm. 2.

*Imm. 2.* Imm. 1 naapertorlugu akuersissut itigartitsissutigineqarpat imaluunniit allanik pissuteqartumik akuersisummik pissarsisoqarsinnaangippat, kommunalbestyrelsip paasissutissat inummut tunngasut, tassunga ilanngullugit paasissutissat inummut tunngasut mianernartut, suliami pissutsit, tassunga ilanngullugu utoqqaap inatsisitigut isumannaatsuunissaa eqqarsaatigalugu erseqqissumik pisariaqartinneqarpat, ingerlateqqissinnaavai. Utoqqaap soqutigisaanik isumaginninnissaq, isertuussinissamik tunngavilersuinissamut soqutigisat ersarissumik qaangersimassagai, tassunga ilanngullugit utoqqarmut pineqartumut paasissutissat tunngassuteqartut mianerineqarnissaasa eqqarsaatigineqarnerat, ingerlatitseqqiinnermut piumasqaataavoq.

**Kapitel 4***Aalajangiisinnaaneq**Tapersersuineq aamma najugaqarfissamik neqerooruteqarneq*

**§ 11.** § 7 naapertorlugu pisariaqartitsineramik naliliineq tunngavigalugu, kapitali 7-imi aalajangersakkat malillugit utoqqarnut najugaqarfissamik neqerooruteqarneq imaluunniit kapitali 5-imi aalajangersakkat malillugit utoqqarnut tapersersuineq pillugit kommunalbestyrelsi aalajangiissaaq.

*Imm. 2.* Pisariaqartitsineramik naliliisoqarsimanngippat, § 7, imm. 1 malillugu pisariaqannginnera pissutigalugu, utoqqaap pisariaqartitai pillugit paasissutissat pigineqareersut tunngavigalugit kommunalbestyrelsi aalajangiisinnaavoq.

*Pinartumik tapersorneqarnissamik pisariaqartitsineq*

**§ 12.** Pisuni, Inatsisartut inatsisaanni matumani ilaatinneqartuni pinartumik tapersorneqarnissamik pisariaqartitsisoqartillugu, § 6 malillugu oqaloqatiginninneq ingerlanneqarsimanngitsoq imaluunniit § 7 malillugu pisariaqartitsineramik naliliineq imaluunniit § 8 malillugu tapersorneqarnissamik pilersaarut suliarineqarnera soq naammassineqarnerorluunniit apeqqutaatinnagit, tapersersuinissaq pillugu kommunalbestyrelsip aalajangiissaaq tamannalu piaarnerpaamik aallarnisarlugi.

*Imm. 2.* Kommunalborgstyrelsi imm. 1 naapertorlugu tapersersuineramik aallarnisaanerup kingorna piaarnerpaamik § 6 malillugu oqaloqatiginninneq ingerlatissavaa, § 7 malillugu pisariaqartitsineramik naliliineq aamma § 8 malillugu tapersorneqarnissamik pilersaarut

sulialarugit naammassillugillu, aamma pisariaqartinneqarpat tamanna tunngavigalugu nutaamik aalajangiilluni.

*Ingerlaavartumik malitseqartitsineq*

**§ 13.** Tapersorsorneqarnissaq imaluunniit najugaqarfissamik neqerooruteqarneq pillugu aalajangiisoqartillugu, tapersorsorneqarnerup siunertamut suli naapertuunnersoq pillugu kommunalbestyrelsi ingerlaavartumik malitseqartitsissaaq. Tapersorsorneqarnissaq imaluunniit najugaqarfissamik neqerooruteqarneq pillugu aalajangiinerup kingorna sivikinnerpaatut kingusinnerpaamik ukiut marluk qaangiutsinnagit malitseqartitsisoqartassaaq.

*Imm. 2.* Malitseqartitsineq tunngavigalugu ilimatsanneqarpat, utoqqat tapersorsorneqarnissamik nutaanik imaluunniit allaanernik pisariaqartitsisoq, § 7 malillugu kommunalbestyrelsi pisariaqartisinermik naliliissaaq

*Imm. 3.* Ingerlaavartumik malitseqartitsineq pillugu malittarisassanik erseqqinnerusunik Naalakkersuisut aalajangersaasinnaapput.

*Tapersorsorneqarnerup aamma najugaqarfissamik neqerooruteqarnerup allanngortinneqarneri unitsinneqarnerilu*

**§ 14.** Kapitali 5-imi aalajangersakkat malillugit inuup tapersorsorneqarnissamik pisariaqartitsinera tapersersuinerup matussusersinnaajunnaaraa kommunalbestyrelsip paasippagu, utoqqarmut tapersorsorneqarnissamik allannguneq imaluunniit unitsitsineq pillugu kommunalbestyrelsi aalajangiissaaq.

*Imm. 2.* Imm. 1 malillugu aalajangiineq § 7 naapertorlugu pisariaqartitsinermik naliliinermik tunngaveqassaaq.

**§ 15.** Kapitali 7-imi aalajangersakkat malillugit utoqqarmut najugaqarfissamik neqeroorutip utoqqaap tapersorsorneqarnissamik pisariaqartitsinera matussusersinnaajunnaarpagu, najugaqarfissamik neqeroorummut allamut nuunnissaq pillugu kommunalbestyrelsi neqerooruteqassaaq.

*Imm. 2.* Imm. 1 malillugu aalajangiineq § 7 naapertorlugu pisariaqartitsinermik naliliineq tunngaveqassaaq.

**§ 16.** § 15 naapertorlugu nuunnissamut neqeroorneq pillugu kommunalbestyrelsi taamaallaat kommuneqarfinnut aggorneqarnerup iluani aalajangiisinnaavoq, taamaattoq takuuk § 4, imm. 4.

*Imm. 2.* Kommunimi allami najugaqarfissamik neqeroorummut nuunnissaq pillugu utoqqaap qinnutigisinnaavaa.

**Kapitali 5**

*Tapersorsorneqarnissamut periarfissat*

§ 17. Kommunalbestyrelsi tapersorneqarnissamut iliuusissanik, pisariaqartitsinermik naliliinerup takutippagu pisariaqartitsisoqartoq, tulluuttunik neqerooruteqassaaq:

- 1) inuttut ikiorteqarneq isumassorneqarnerlu,
- 2) angerlarsimaffimmi ikiorteqarneq,
- 3) ulloq unnuarlu ikiorneqarneq,
- 4) atortorissaarutit,
- 5) qanigisanik siunnersuineq ilitsersuinerlu,
- 6) nammineq angerlarsimaffimmiit najugaqarfissamik neqeroorummut nuunnermut atatillugu nuunnermi ikiorneqarneq,
- 7) sungiusarneq,
- 8) ingiaqateqarneq,
- 9) sammisassaqartitsinermut katerisimaartitsinermullu neqerooruteqarneq,
- 10) ataatsimoorussamik biiliunneqarneq, imaluunniit
- 11) Peqqinnissaqarfimmi katsorsartinnermiit kommunimut angerlarsimaffigisamut ikaarsaarnermut atatillugu tapersorneqarneq.

*Imm. 2.* Imm. 1 malillugu tapersorneqarnissamut iliuuserisassanik atuuttunngortitsineq pillugu Naalakkersuisut malittarisassanik erseqqinnerusunik aalajangersaassapput.

§ 18. Utoqqarnut kommunimi najugaqartunut, angerlarsimaffimmut pulaarneq pitsaaliuisoq pillugu kommunalbestyrelsi neqerooruteqassaaq. Angerlarsimaffimmut pulaarneq pitsaaliuisoq neqeroorutigineqassaaq:

- 1) utoqqarnut, kisimiittunut, 72-inik ukioqalertunut,
- 2) utoqqarnut 75-inik aamma 80-inik ukioqalertunut,
- 3) utoqqarnut 82-ileereertunut ukioq allortarlugu, aamma,
- 4) utoqqarnut pisariaqartitsineq malillugu, isumaginninnikkut atugarliortunut imaluunniit tarnikkut timikkulluunniit piginnaasakillisunut,
- 5) piaarnerpaamik, utoqqaap aapparisa, inooqataa imaluunniit najugaqatigisaa:
  - a) toqukkut qimaguppat,
  - b) utoqqarnut imaluunniit inunnut innarluutilinnut najugaqarfissamik neqeroorummut kisimiilluni nuuppat,
  - c) pisortat iliuuseqarneratigut angerlarsimaffiup avataani najugaqarallarp, najugaqarallarnerlu qaammat ataaseq sinnerlugu sivirususeqassasoq naatsorsuutigineqarpat, imaluunniit
  - d) peqqinnissaqarfimmi uninngappat.

*Imm. 2.* § 17, imm. 1, nr. 2 malillugu utoqqarnut, angerlarsimaffimmi ikiorteqartunut, angerlarsimaffimmut pulaarneq pitsaaliuisoq pillugu neqerooruteqarnissaq kommunalbestyrelsip pinngitsoortissinnaavaa.

*Imm. 3.* Angerlarsimaffimmut pulaarneq pitsaaliuisoq pillugu Naalakkersuisut malittarisassanik erseqqinnerusunik aalajangersaasinnaapput.

## Kapitali 6

*Utoqqarnut najugaqarfissamik neqeroorummik pilersitsineq ingerlatsinerlu*

**§ 19.** Utoqqaat najugaqarfiinik kommunalbestyrelsi pilersitsisinnaavoq, ingerlatsisinnaalluni atorunnaarsitsisinnaallunilu.

*Imm. 2.* Utoqqaat najugaqarfiinut, tassunga ilanngullugit aaqqissuunneqarnerat, tikinneqarsinnaanerit, aqunneqarnerat aamma sulisut pinerluuteqarsimannginnerannut uppersaammik pissarsiniarnissaq pillugu piumasaqaat pillugit malittarisassanik erseqqinnerusunik Naalakkersuisut aalajangersaasinnaapput.

**§ 20.** Utoqqaat najugaqatigiiffiinik kommunalbestyrelsi pilersitsisinnaavoq, ingerlatsisinnaalluni atorunnaarsitsisinnaallunilu.

*Imm. 2.* Utoqqaat najugaqatigiiffiinut, tassunga ilanngullugit aaqqissuunneqarnerat, tikinneqarsinnaanerit, aqunneqarnerat aamma sulisut pinerluuteqarsimannginnerannut uppersaammik pissarsiniarnissaq pillugu piumasaqaat pillugit malittarisassanik erseqqinnerusunik Naalakkersuisut aalajangersaasinnaapput.

**§ 21.** Utoqqaat angerlarsimaffiannik kommunalbestyrelsi pilersitsisinnaavoq, ingerlatsisinnaalluni atorunnaarsitsisinnaallunilu.

*Imm. 2.* Utoqqaat angerlarsimaffianni puiguttortunut immikkoortumik immikkoortortaqaqarnissaa kommunalbestyrelsip qulakkiissavaa.

*Imm. 3.* Utoqqaat angerlarsimaffiat pillugu malittarisassanik erseqqinnerusunik Naalakkersuisut aalajangersaasinnaapput, tassunga ilanngullugit ilaatigut:

- 1) aaqqissuunneqarnerat, tassunga ilanngullugu puiguttortunut immikkoortortaqaqarfiup aaqqissuunneqarnera,
- 2) aqutsinikkut sulisoqarnikkullu piginnaasat,
- 3) innersuussineq inissamillu tunniussineq,
- 4) paaqqinninnermut isumassuinnermullu pitsaassutsit,
- 5) tikinneqarsinnaaneq, aamma
- 6) sulisunik ingerlaqqittumik ilinniartitaaneq pikkorissaanerlu.

**Kapitali 7***Najugaqarfissamik neqerooruteqarneq*

**§ 22.** Utoqqarmut najugaqarfissamik neqeroorummik naleqquttumik kommunalbestyrelsi neqerooruteqassaaq, tak. § 23-25, ima pisoqarpat:

- 1) inuk ukiut malillugit pissutsit, tassunga ilanngullugit timikkut, tarnikkut, silassorissutsikkut imaluunniit malugisaqarsinnaassutsikkut piginnaanikillineq, pissutigalugit ulluinnarni tapersorneqarnissamik pisariaqartitsippat,
- 2) inuk ukiut malillugit pissutsit, tassunga ilanngullugit timikkut, tarnikkut, silassorissutsikkut imaluunniit malugisaqarsinnaassutsikkut piginnaanikillineq pissutigalugit nammineq angerlarsimaffimmini najugaqarsinnaanngippat, imaluunniit



- 3) inuup pisariaqartitai najugaqarfissamik neqerooruteqarnikkut pitsaanerpaamik matussuserneqarsinnaappata.

*Imm. 2.* Utoqqaap najugaqarfissamik neqeroorummi qinnuteqarnerata imaluunniit nammineq ingerlataqarnerup kingorna kommunalbestyrelsip neqeroorfigisinnaavaa.

*Imm. 3.* Utoqqaap sapinngisamik najugaqarfissamik neqeroorummi nunaqqataasunut qanittumiittumi najugaqarnissaanik kommunalbestyrelsip neqeroorfigissavaa.

*Imm. 4.* Utoqqaap najugaqarfissamik neqeroorummi kommunalbestyrelsip najugaqarallarnissaanik neqeroorfigisinnaavaa.

#### *Utoqqaat najugaqarfiat*

**§ 23.** Utoqqarmut kommunimi utoqqaat najugaqarfianni najugaqarnissaanut kommunalbestyrelsi neqerooruteqassaaq, ima pisoqarpat:

- 1) inuk ima nammineersinnaatigippat, suliassatigut pisariaqartitsinera taamaallaat ulluunerani nalunaaquttap akunnerini pisariaqarluni, imaluunniit
- 2) inuup pisariaqartitsinera utoqqaat najugaqarfianni matussuserneqarsinnaappat.

#### *Utoqqaat najugaqatigiiffiat*

**§ 24.** Utoqqarmut kommunimi utoqqaat najugaqatigiiffianni najugaqarnissamut kommunalbestyrelsi neqerooruteqassaaq, ima pisoqarpat:

- 1) inuk timikkut, tarnikkut, silassorissutsikkut imaluunniit malugisaqarsinnaassutsikkut pingaarutilimmik piginnaanikillineq pissutigalugu ulluinnarni tapersorneqarnissamik pisariaqartitsippat,
- 2) inuk ima nammineersinnaatigippat, suliassatigut pisariaqartitsinera taamaallaat ulluunerani nalunaaquttap akunnerini pisariaqarluni, imaluunniit
- 3) inuup pisariaqartitai, tassunga ilanngullugit inooqataanermut pisariaqartitai, utoqqaat najugaqatigiiffianni najugaqarnikkut pitsaanerpaamik matussuserneqarsinnaappata.

#### *Utoqqaat angerlarsimaffiat*

**§ 25.** Utoqqarmut kommunimi utoqqaat angerlarsimaffianni najugaqarnissamut kommunalbestyrelsi neqerooruteqassaaq, ima pisoqarpat:

- 1) inuk ukiut malillugit pissutsit, tassunga ilanngullugit timikkut, tarnikkut, silassorissutsikkut imaluunniit malugisaqarsinnaassutsikkut piginnaanikillineq, pissutigalugit ulluinnarni annertuumik imaluunniit immikkuullarissamik tapersorneqarnissamik imaluunniit paaqqutarineqarnissamik, isumassorneqarnissamik katsorsarneqarnissamilluunniit pisariaqartitsippat pisariaqartitallu allatigut matussuserneqarsinnaanngippata,
- 2) inuk ukiut malillugit pissutsit, tassunga ilanngullugit timikkut, tarnikkut, silassorissutsikkut imaluunniit malugisaqarsinnaassutsikkut piginnaanikillineq, pissutigalugit nammineq angerlarsimaffimmini, utoqqaat najugaqarfianni imaluunniit utoqqaat najugaqatigiiffianni najugaqarsinnaanngippat,

- 3) inuk utoqqaat najugaqarfianni imaluunniit utoqqaat najugaqatigiiffianni neqeroortigineqartut saniatigut tapersorsorneqarnissamik pisariaqartitsippat, tassunga ilanngullugu ulloq unnuarlu kaajallallugu tapersorsorneqarnissamik pisariaqartitsinermik, imaluunniit
- 4) inuup pisariaqartitai utoqqaat angerlarsimaffianni pitsaanerpaamik matussuserneqarsinnaappata.

## **Kapitali 8**

### *Nalunaarutiginnittarneq*

#### *Nalinginnaasumik nalunaarutiginninnermik pisussaaffeqarneq*

**§ 26.** Utoqqaq atugarissaarnermut, peqqissutsimut imaluunniit ineriartornermut navianartorsiortitsisumik atugaqartoq innuttaasup paasippagu, innuttaasoq kinaluunniit kommunalbestyrelsimut nalunaarutiginninnissaminut pisussaaffeqarpoq.

*Imm. 2.* Kommunalbestyrelsip nalunaarutiginninnerup tignerata kingorna qaammatisiutini ullut arfineq-marluk qaangiutsinnagit, nalunaarutiginninnerup tiguneqarnera pillugu innuttaasumut allaganngorlugu uppersaalluni nassiutissavaa.

#### *Sukanneruserusumik nalunaarutiginninnermik pisussaaffeqarneq*

**§ 27.** Isumaginnittoqarfinni peqqinnissaqarfinnilu sulisut inuussutissarsiutigalugu sulinerminnut atatillugu, utoqqaq kapitali 5 naapertorlugu tapersorsorneqarnissamik pisariaqartitsisoq, sulisup paasippagu, imaluunniit ilimaginissaanut pissutissaqarpat, ingerlaannaq kommunalbestyrelsimut nalunaarutiginninnissamik sukanneruserusumik pisussaaffeqarput. Nalunaarutiginninnissamik pisussaaffik sukanneruserusoq, innuttaasunit tamanit qinerneqarlutik suliaqartunut imaluunniit inuiaqatigiinni sullissillutik suliaqartunut, atuuppoq.

*Imm. 2.* Kommunalbestyrelsip nalunaarutiginninnerup tignerata kingorna qaammatisiutini ullut arfineq-marluk qaangiutsinnagit, nalunaarutiginninnerup tiguneqarnera pillugu sulisumut nalunaarutiginnittumut allaganngorlugu uppersaalluni nassiutissavaa.

#### *Kommunit akunnerminni nalunaarutiginninnermik pisussaaffiat*

**§ 28.** Utoqqaq nammineq piumasani malillugu kommunimut allamut nuuppat, aamma kapitali 5-imi aalajangersakkat malillugit tapersorsorneqarnissamik pisariaqartunik inuttaata tapersorsorneqarnera ingerlatiinnarneqanngippat inuup atugarissaarnera navianartorsiortinneqassasoq nalilerneqarpat, kommunalbestyrelsi kommunimut nuuffigineqartumut allaganngorlugu nalunaarutiginnissaaq.

*Imm. 2.* Imm. 1 malillugu nalunaarutiginninnermut atatillugu kommunip qimanneqartup allagaatit suliamut attuumassuteqartut nassiutissavai, tassunga ilanngullugit paasissutissat

attuumassuteqartut eqikkarneqarnerat, tapersorsorneqarnissamik pisariaqartitsinermik naliliinermut kommunip qimanneqartup tunngavigisaanik imaqartut.

*Imm. 3.* Kalaallit Nunaanniit nuuttoqartillugu, kisianni naalagaaffeqatigiinnerup iluani, kommunimut nunani allaniittumut imaluunniit oqartussamut taamaaqataanut allamut imm. 1-2 taamaaqataanik atuupput.

*Nalunaarutiginnittoqartillugu kommunip iliuuseqarnissamik pisussaaffeqarnera*

**§ 29.** §§ 26, 27 imaluunniit 28 naapertorlugit utoqqaq pillugu nalunaarutiginninnerup tiguneqarnerata kingorna, § 12 naapertorlugu utoqqaap atugarissaarnera, peqqissusia imaluunniit ineriartornera ima ulorianartorsiortiginersaq pillugu kommunalbestyrelsi, pinartumik tapersorsorneqarnissamik pisariaqartitsisoqarluni, nalunaaquttap akunneri 24-t iluanni naliliissaaq. § 12 naapertorlugu tapersorsorneqarnissaq pisariaqartinneqarpat ingerlaannaq aallartinneqassaaq.

*Imm. 2.* §§ 26, 27 aamma 28 naapertorlugit utoqqaq pillugu nalunaarutiginninnerup tiguneqarpat, kommunalbestyrelsi piaarnerpaamik, taamaattoq qaammatisiutini ullut arfineq-marluk qaangiutsinnagit, § 7 naapertorlugu pisariaqartitsinermik naliliinermik suliaqartoqarnissaanut tunngavissaqarnerisq pillugu kommunalbestyrelsi aalajangiissaaq, imaluunniit § 18 naapertorlugu angerlarsimaffimmut pulaarnej pitsaaliuisoq pillugu neqerooruteqarluni.

*Imm. 3.* Imm. 2 naapertorlugu pisariaqartitsinermik naliliineq pillugu kommunalbestyrelsi aalajangiippat, nalunaarutiginninnerup tiguneqarnerata kingorna piaarnerpaamik kingusinnerpaamillu qaammatisiutini ullut 14-it qaangiutsinnagit pisariaqartitsinermik naliliineq aallartinneqassaaq.

*Imm. 4* Imm. 2 naapertorlugu angerlarsimaffimmut pulaarnej pitsaaliuisoq pillugu neqerooruteqarniarluni kommunalbestyrelsi aalajangiippat, nalunaarutiginninnerup tiguenerata kingorna piaarnerpaamik kingusinnerpaamillu qaammatisiutini ullut 14-it qaangiutsinnagit angerlarsimaffimmut pulaarnissaq neqeroorutigineqassaaq. Utoqqaap angerlarsimaffimmut pulaarnej pitsaaliuisumik neqeroorutigineqarnej itigartitsissutigippagu, pisariaqartitsinermik naliliinissamut suliaqarnissamut tunngavissaqarnerisq pillugu kommunalbestyrelsi aalajangiissaaq.

*Imm. 5.* Utoqqarmut paarsinerluineq, nakuusernej, tassunga ilanngullugu nakuusernissamik sioorasaarineq, imaluunniit kinguaassiuutitigut innarliineq pillugu kommunalbestyrelsi nalunaarutiginninnermik tigusaqarnermini pasitsaassinermik kinguneqarpat, § 7, imm. 2 naapertorlugu pisariaqartitsinermik naliliineq aamma § 12 naapertorlugu tapersersuisinnaaneq, nalunaarutiginninnerup tiguneqarnerata kingorna ingerlaannaq aamma kingusinnerpaamik nalunaaquttap akunneri 24-t qaangiutsinnagit aallartinneqassapput.

*Imm. 6.* Atukkat ernumanartoqartut, §§ 26, 27 aamma 28 naapertorlugit nalunaarutiginninnermut pisussaaffeqarnermut ilaatinneqartut, kommunalbestyrelsip nammineq ingerlataminik paasippagit, imm. 1-5 naapertorlugit kommunalbestyrelsip iliuuseqarnissamik pisussaaffeqarnera taamaaqataanik atuuppoq.

## Kapitali 9

### *Nakkutilliineq peqqussuteqarnerlu*

#### *Ingerlatsinermut sammititamik kommunimi nakkutilliineq*

**§ 30.** Kapitali 6-imi aalajangersakkat malillugit utoqqaat utoqqaat angerlarsimaffiannik, kommunalbestyrelsip pilersitaanik ingerlataanillu ingerlatsinermut sammititamik kommunalbestyrelse nakkutilliisaaq.

*Imm. 2.* Imm. 1 malillugu nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 3.* Naalackersuisuniit qinnuigineqarneq tunngavigalugu kommunalbestyrelsip nakkutilliinermik isumaginninneranut paasissutissat kissaatigineqartut tamaasa nassiunneqarnissaat kommunalbestyrelsimut pisussaaffiuvoq.

*Imm. 4.* Imm. 1 naapertorlugu ingerlatsinermut sammititamik nakkutilliinermut malittarisassanik erseqqinnerusunik Naalackersuisut aalajangersaasinnaapput, tassunga ilanngullugit:

- 1) kommunalbestyrelsip nakkutilliinermik pisussaaffeqarnerminik ingerlatsinera,
- 2) nakkutilliinermik aqqissuussinera,
- 3) nakkutilliinermik pisussaaffeqarnerup naammassineqarnissaanut atugassarititat piumasaaqatillu, aamma
- 4) kommunalbestyrelsip nakkutilliinermut nalunaarusiamik suliaqartarnera.

**§ 31.** Inatsisartut inatsisaannik aamma allaffissornikkut najoqqutassat pillugit Inatsisartut inatsisaannik eqquutitsineq aamma pisussaaffinnik naammassinnineq pillugit Naalackersuisut kommunalbestyrelsimut peqqussuteqarnermik nalunaaruteqarneq pillugu aalajangiisnaapput.

*Imm. 2.* Imm. 1 malillugu peqqussuteqarnermi peqqussuteqarnerup qaqugu malinneqarnissaa pillugu piffissaliisoqarsinnaavoq.

*Imm. 3.* Qaqugukkut peqqussuteqartoqartassanersoq pillugu Naalackersuisut malittarisassanik erseqqinnerusunik aalajangersaasinnaapput.

## Kapitali 10

### *Utoqqaat siunnersuisoqatigiit, utoqqarnut politikki aamma pitsaassutsit*

**§ 32.** Kommunalborgstyrelsi utoqqarnut siunnersuisoqatigiinnik pilersitsisaaq. Utoqqaat siunnersuisoqatigiit apeqqutit toqqaannartumik utoqqarnut tunngasuteqartut pillugit kommunalborgstyrelsimut siunnersuissapput aamma najukkami politikikkut apeqqutit utoqqarnut tunngasut tamaasa pillugit innuttaasunit, utoqqarnit aamma kommunalborgstyrelsimut isummat pillugit ingerlatitseqqittassallutik.

*Imm. 2.* Suliniutit utoqqarnut pingaaruteqartut tamaasa pillugit kommunalborgstyrelsip utoqqaat siunnersuisoqatigiit tusarniaaffigisassavai.

*Imm. 3.* Utoqqaat siunnersuisoqatigiit apeqqutinik inunnut ataasiakkaanut tunngasunik suliaqarsinnaanngillat.

*Imm. 4.* Utoqqaat siunnersuisoqatigiinnut ilaasortat sisamat arfineq-pingasullu akornanni amerlassuseqassapput.

*Imm. 5.* Utoqqaat siunnersuisoqatigiit utoqqarnut suliaqarfiup iluani soqutigisaqartunik imaluunniit suliaqartunik katitigaassapput.

*Imm. 6.* Utoqqaat siunnersuisoqatigiiffiannut pisariaqartillugu allattoqarfeqarnermut tunngasunik kommunalbestyrelsi ikiuuttassaaq.

*Imm. 7.* Utoqqaat siunnersuisoqatigiit suliaqarnerat katitigaanerallu pillugit malittarisassanik erseqqinnerusunik kommunalbestyrelsi aalajangersaasinnaavoq.

**§ 33.** Kommunalbestyrelsi utoqqarnut politikkimik ataqatigiittumik ilusiliissaaq. Utoqqarnut politikki najugaqarfissamik neqerooruteqarnermi aamma tapersersorneqarnissamut periarfissat qulakkeerneqarneranni pilersaarusiorneq, politikki isumalluutinillu aningaasaliineq ukiut sisamakkuutaarlugit pingaartumik inuit agguataarnerannik eqqarsaatiginnittoq pillugit paasissutissanik imaqaassaaq, tak. kapitali 2.

*Imm. 2.* Kommunip utoqqarnut politikkimik suliaqarnerani kommunalbestyrelsip utoqqaat siunnersuisoqatigiiffiat ilanngutitissavaa.

*Imm. 3.* Utoqqarnut politikki allaganngorlugu ilusilerneqassaaq kommunillu nittartagaani tamanut ammasumik saqqummiunneqarluni kiisalu Naalakkersuisunut ilisimatitsissutitut nassiunneqarluni.

*Imm. 4.* Utoqqarnut politikki sivisunerpaamik ukiut sisamakkuutaarlugit iluarsaanneqartassaaq.

**§ 34.** Kapitali 5 malillugu utoqqaat tapersersorneqarnissaannut pitsaassusissanut malittarisassanik kommunalbestyrelsi aalajangersaassaaq. Pitsaassusissanut malittarisassat tapersersuinerit ataasiakkaat suussusaasa imarisai, annertussusai suliarineqarnerilu pillugit paasissutissanik imaqaassapput. Pitsaassusissatut aalajangersarneqartut qanoq malitseqartinneqassanersut pillugit kommunalbestyrelsi aalajangiissaaq.

*Imm. 2.* Kapitali 6 aamma 7 malillugit utoqqarnut najugaqarfissamik neqerooruteqarnermi pitsaassusissanik malittarisassat pillugit kommunalbestyrelsi aalajangersaassaaq. Pitsaassusissanik malittarisassat najugaqarfissamik neqeroorummi pisariaqartitat sorliit naammassineqassanersut pillugit paasissutissanik imaqaassapput. Pitsaassusissanik malittarisassat aalajangersarneqartut qanoq malitseqartinneqassanersut pillugit kommunalbestyrelsi aalajangersaassaaq.

*Imm. 3.* Imm. 1 aamma 2 malillugit pitsaassusissat allaganngorlugit suliarineqassapput. Kommunip nittartagaani immikkut ittumik aamma utoqqarnut politikkimut atatillugu tamanut ammasumik saqqummiussisoqassaaq, tak. § 33. Pitsaassusissat Naalakkersuisunut ilisimatitsissutitut nassiunneqassapput.

*Imm. 4.* Imm. 1 aamma 2 malillugit pitsaassusissat, pisariaqartitsineq malillugu aamma sivikinnerpaamik ukioq allortarlugu kommunalbestyrelsip iluarsaattassavai.

*Imm. 5.* Imm. 1 aamma 2 malillugit pitsaassusissat ilusaat imarisaallu pillugit Naalakkersuisut malittarisassanik erseqqinnerusunik aalajangersaasinnaapput.

### **Kapitali 11**

#### *Aningaasalersuineq aamma akigitat*

§ 35. Inatsisartut inatsisaat manna naapertorlugu inunnut tapersorsorneqartunut aningaasartuutit kommuninit akilerneqassapput.

*Imm. 2.* Inatsisartut inatsisaat manna naapertorlugu utoqqaat angerlarsimaffiannik, utoqqaat najugaqatigiiffiannik aamma utoqqaat najugaqarfiinik utoqqaat angerlarsimaffiannik nammineq pilersitsinermut ingerlatsinermullu atatillugu aningaasartuutit kommunit tamarmik immikkut akilertassavaat.

### **Kapitali 12**

#### *Naammagittaalliuuteqarsinnaaneq*

§ 36. Inatsisartut inatsisaat manna malillugu kommunalbestyrelsit aalajangiineri isumaginnittoqarfiup aqunneqarnera aaqqissussaanelu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

### **Kapitali 13**

#### *Aalajangersakkat allat*

#### *Naatsorsueqqissaarneq*

§ 37. Naalakkersuisut qinnutiginninnerat tunngavigalugu naatsorsueqqissaarnermik paasissutissat assigisaallu nassiunnissaanut kommunalbestyrelsi pisussaaffeqarpoq.

*Imm. 2.* Imm. 1 naapertorlugu naatsorsueqqissaarnermi paasissutissat assigisaallu nassiunneqartussat annertussusaat aamma qanoq nutarterneqartarnissaat nassiunneqartarnissaallu pillugit Naalakkersuisut malittarisassanik aalajangersaasinnaapput.

#### *Pineqaatissiissutinut aalajangersakkat*

§ 38. Naalakkersuisut § 31 malillugu peqqussuteqarneq eqquutsinneqanngippat, kommunalbestyrelsimut ilaasortanut, eqquutitinneqannginneranut akisussaasunut, pinngitsaaliissummik akiliisitsiniarlutik peqqussuteqarsinnaapput.

*Imm. 2.* Pinngitsaaliissummik akiliisitsiniarnerup annertussusaa unioqquutsinerup annertussusaa aamma sivisussusaa eqqarsaatigalugit aalajangersarneqartassaaq.

*Imm. 3.* Pinngitsaaliissummik akiliisitsiniarnerit ullormut akiligassiinertut peqqussutigineqassapput, peqqussuteqarnerup eqquutsinneqarnissaata tungaanut ullormiit ullormut ingerlasassallutik.

*Imm. 4.* Inatsisartut inatsisaanni matumani tunngavigisaq malillugu pinngitsaaliissummik akiliisitsiniarnerit Nunatta Karsianut tutsinneqassapput.

### **Kapitali 14**

*Atuutilersitsinermut, atorunnaarsitsinermut ikaarsaarnermullu aalajangersakkat*

**§ 39.** Inatsisartut inatsisaat manna ulloq 1. januar 2026-mi atuutilerpoq.

*Imm. 2.* Peqatigalugu atorunnaarsinneqarput

- 1) utoqqalinersiaqarneq pillugu Inatsisartut inatsisaat nr. 20, 23. november 2015-imeersumi § 18 aamma § 27, imm. 6,
- 2) inersimasunut paaqqinniffiit immikkut siunertallit pillugit Inatsisartut peqqussutaat nr. 6, 28. april 1988-imeersoq,
- 3) utoqqarnik paaqqinniffiit il.il. pillugit Inatsisartut peqqussutaat nr. 11, 30. oktober 1998-imeersoq.

*Imm. 3.* Utoqqarnik paaqqinniffiit il.il. pillugit Inatsisartut peqqussutaat nr. 11, 30. oktober 1998-imeersumi taaneqartumi allaffissornikkut najoqqutassanut tunngavigisami imm. 2, nr. 3-mi aalajangersarneqartut atuutiinnassapput, Inatsisartut inatsisaanni matumani imaluunniit allani tunngavigisatut malittarisassanik aalajangersaanikkut taarserneqarnissaata imaluunniit atorunnaarsinneqarnissaata tungaannut.

### **Kapitali 15**

*Inatsisini allani allannguinerit*

**§ 40.** Namminersorlutik Oqartussat inatsimmik nalunaarutaat nr. 13, 16. marts 2024-meersoq naapertorlugu isumaginninnermik suliassa qarfirmi pissaanermik atuneq pillugu Inatsisartut inatsisaanni tulliuttunik allannguisoqarpoq:

- 1) Inatsit tamakkerlugu allaqqasut ”utoqqarnik paaqqinniffik” aamma ”utoqqarnik paaqqinniffiit” allanngortinneqassapput ima: ”utoqqarnut najugaqarfissamik neqeroorut”
- 2) § 32, *imm. 1, nr. 3*, ima allanneqassaaq:
- ”3) Utoqqarnut tapersersuineq pillugu Inatsisartut inatsisaat malillugu najugaqarfissamik neqeroorummi.”

*Namminersorlutik Oqartussat, ulloq xx. xxx 2024*

### **Naalakkersuisut Siulittaasuat**